



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 3

Israel Ato Kilonser Netanyahu okadak nokdak

Kejriwal-i auto anishirtem nem insurance lakh 10 agütsütsü nangzük

VOL. XXII ISSUE NO. 62 (ADOK 62) DIMAPUR RASEMNÜ (WEDNESDAY) LUCHII (DECEMBER) 11, 2024 ₹ 5.00

Nagaland longjemdaksüba aser azükaruba bentsür aruba Hornbill Festival tembangogo

Kohima, December 10, 2024 (TYO): "Festival of Festivals" ta ajaba 25 buba Hornbill Festival tanü anogo 10 tashi monga arur tembangogo.

Kisama nung aliba Naga Heritage Village nung Folkloric Group, Tetseo Sisters, Alogo Naga nung dena nisung aikati benjung tembangba sentong nung shilem agia liasü.

Benjung tembangba sentong nung Minister Counselor for Public Diplomacy at the US Embassy, New Delhi, Gloria Berdena, Tourism and Higher Education Minister Temjen Imna Along, Miss Nagaland 2024 Anon Konyak, first runners-up Nikali K Shohe aser second runners-up Kelülü Dawhuo nung aden.

"Iba benjung takok anguba nung yariteper ajak dang kanga pelar aser Tsüngremi benjung tiptema mongdaksüba atema pelar" ta Minister Temjen Imna Along-i ashi.

Hornbill Festival ajanga Nagaland nung telongjem adokdaksür, tanüla akasodaksür



December 10, 2024 nü Naga Heritage Village, Kisama nung Ao Cultural Troupe-i Watemdong Cultural Dance ia sayuba angur.

aser azükaru bentsür arur. Iba benjung ya state nung nübortem aser kintem longjemba mapang ka lir, ta pai ashi.

"Chief Minister Neiphu Rio-i mangdang tulu yur lenisüba ajanga iba benjung ya lisopur benjung ka nungi Nagaland nung telongjem aser azükaru bentsür aruba benjung ka kumdaksüogo" ta Minister Along-i ashi.

United States, United Kingdom, Japan, aser Peru linüktem den külemi state partners- Sikkim o Telangana-i yaritepba ajanga sobaliba lemsatepba tali akangshio go aser international tesentaktem yanguogo ta paisa metetdaksü.

"Küm 25 tashi Hornbill Festival monga aruba meyipa reprangdang tarutsü atema teimla

tulu ayur. Küm 25 tongtetba senmang ya maneni tuluba küma aotsü aser tarutsü anogotem Nagaland nung alirtem asoshi azükaru aser telongjem bentsür arutsü" ta Along-isa ashi.

"Kisama nung Hornbill Festival nung anogo ka amongba ya taküm piyong atema mamadokba mapang ka lir" ta paisa ashi.

Hornbill Festival ya Nagaland

asoshi sobaliba lemsatepba, telongjem adokba aser azükaru bentsür aruba benjung ka asütsü amanger ta Minister Along-isa ashi.

Advisor K. Konngam Konyak-i anir Department of Art & Culture ajanga Nagaland tesem balala nungi teka mapa inyakterem anir arua alima dang Naga nung sobaliba aser senmang sayuba atema pelar. Maneni, Tourism Department-i benjung kanga meraketa takok ngudaksüba aser TaFMA-i anogo 10 tashi music and arts nung maongka balala agütsüba atema pelar ta pai ashi.

Minister Imna Along-isa Police dang mapa tajung inyakba den line Departments, Ministers, Advisors aser Chief Secretary Dr. J. Alam-i anir Administrative Head of Departments o Head of Departments ajak dang pelaba metetdaksü.

Nagaland nung Arogotem aser nübortemi iba benjung nung yaritepba aser kibur ama shilem agiba atema pelar. Maneni, media fraternity-i alima dang iba benjung sayuba atema pelar ta Along-isa ashi.

MCCI-i benjung timi amongtsü ayongzük

Dimapur, December 10, 2024 (TYO): Mokochung Chamber of Commerce and Industry (MCCI)-i benjung mongpu timi amongtsü aser kari tebilemtsü khuret mabenba ajanga tangar temulung meyirudaksütsü ayongzükogo.

MCCI-isa Mokochung nung shishilembartemi benjung mapang tajangzük agia shishilembaba nung tim masüba meinyaksü metetdaksüogo.

Tim masüba inyakyim kar beshiba ajanga shishilembartem asoshi tenüng menük bentsür arurtem ozüng tapet agi merenshitsu ta MCCI-i ashi.

Mokochung nung

shishilembartem firecrackers bener aruba, bendena ayuba aser ayokba noktanger. Maneni shishilembartemi pei pei dokan kima nung customers nem tawa agüja pei garitem anena mayutsü mepishir ta parnokisa metetdaksüogo.

Maneni, shishilembartem dang calendars, raffle, buffet vouchers, housie, tickets amala mayoktsü noktanger ta MCCI-isa ashi.

Mokochung nung sorkar agency mesüra NGO temi MCCI dang nungi temelaba magii shishilembartem dang nungi tenla mesüra sen meshiba noktanger ta parnokisa ashi.

Dimapur nung ROB takumbo merenemtsü: NCD

Dimapur, December 10, 2024 (TYO): Naga Council Dimapur (NCD)-i Dimapur nung Road Over Bridge (ROB) yangluba tesem tonga oa semdanga bangdak engineers aser contractor den ajurutepogo.

ROB yangluba ajanga benjung mapang traffic timtem kanga ajuruba atema public-i ola adoka rongshiba sülen NCD-i apuba yangluba reprangdangogo aser parnoki ashiba agi taküm kumbo apu meyagluzüktsü.


Commissioner of Police, Dimapur-i traffic kanga junga ketdangsüa arur aser railway flyover ka dang aliba ajanga traffic nung timtem ajurur. Iba jagi Dimapur Traffic Police-i odd & even system tenzükba ya mapa tajung ka lir ta NCD-i ashi.

Anüngdang aser aonung senzüba public bus garitem aser talisa Supermarket bus station nungi apusortemi ISBT nungi senzütsüla. Iba ajanga traffic timtem ajema akumba dang masü

saka sorkar infrastructure timi amshitsü, ta NCD-isa metetdaksü.

NCD-isa Dimapur Urban Development Department dang benjung mongpu matemdanga Dimapur yim aser temeket nung gari lenmang ajak anepalutsü metetdaksür ta Vice President C B, Naga Council Dimapur. G.K. Rengma aser Convenor, Vigilance Committee, Naga Council N. Joseph Lemtur nati sangdong ka nung shiogo.

US Embassy-i US-India tesentaktem akangshiba metetdaksü



Gloria Berdena

Kohima, December 10, 2024 (TYO): US-i Nagaland nung Hornbill Festival den yaritepba ajanga linük ana tsüngda tesentaktem tali akangshitsu ta Minister Counselor for Public Diplomacy at the US Embassy, New Delhi, Gloria Berdena-i ashi.

"US-i taküm Hornbill Festival nung shilem agiba atema pelar. Iba benjung nung US ya partner country ka lir aser sobaliba lemsatepba nung Native American jazz shilem agiogo" ta Berdena-i ashi.

"Hornbill Festival nung Naga nung lisopur sobaliba balala sayuba atema tenüngsang

agütsür aser cross-cultural tesentaktem ya kanga tongtipang lir" ta laisa ashi.

"Nagaland University semdangdang US aser Nagaland University tsüngda shisaliok o sobaliba lemsatepsü lenmang aliba ajitetogo. Nagaland University aser tanga shisaliok rejutemi tebilembatem lemsatepogo aser onoki tesentaktem yanglua yaritepsü mulunga lir" ta lai ashi.

"Onoki Northeast aser talisa Nagaland den student exchange, educational exchange amala inyaknür" ta laisa shisem.

Berdena-i US Mission in India atema educational, cultural exchange programs, aser media relations ajanga ketdangsüa repranger.

"U.S.-India tesentaktem kanga junga lir aser President Joe Biden o Secretary Antony Blinken naprongi iba tesentaktem yasa tajungtiba ta shiogo" ta lai osangbener dang ashi.

tsüngda amalitep aliba ya rongsenketzung tayongzükbatem koktettsü atema lir ta laisa shisem.

Laisa educational exchange programs indang jembidang Fulbright Program ajanga US aser India tsüngda students aser scholars yoka züngdaksüba ashi.

"India nung kaketshir aika US nung azünger anungji Nagaland nungi kaketshirtemi ibala programs atema tenüng agütsütsü ayongzük" ta Berdena-i ashi.

US Embassy-i people-to-people connections tajungba kumdaksütsü atema EdUSA tenzüka lir. Iba ya free advising service ka lir aser India kaketshirtemi U.S. application process atema len sayur, ta laisa ashi.

Maneni, India nung American Centers aser consulates ajanga students aser faculty nem academic resources agütsür ta Berdena-isa metetdaksü.

US-i sobaliba wazüka ayutsü atema temulung agütsür aser US Embassy-i maneni sobaliba senmang yaritsu ta lai ashi.

OFFICE OF THE
AO SENDEN
"Nübur Asoshi" (For the People)

Ref. No. Date : 10/12/2024

AO SENDEN RONGDAK SANEN LUDEN SENDEN 09/12/2024 ANOGO LEMTET SANGDONGER:

1. Facebook, The Patriotic Nagas sabang nung Ao kin, Aotsür aser Dr. S.C. Jamir mezüngmeshia züluba nisung pua bener aruba takok maparen asoshi Nagaland Governor His Excellency La Ganesan, Shri. Rupin Sharma IPS, DGP aser Nagaland Police dang pelaba lemsateper.
2. Iba keno yagi Ao kin dak teret nung arangnungji iba keno met denji Ao Senden Kilem nung Ao sobaliba nung ajemdaker jembitsü
3. Iba keno dak sentakba nung Aor kija aser lokti shiri Ao Senden lemtet anema O aser mapa agi inyakdir Ao Senden Kilem nung jaoka tapet temerenshi agütsütsü.

(Marsanen Imsong)
Tir

(Imtipokym)
Tongti Zülur

Longleng nung Activism Against Gender Based Violence tembangogo



Anogo 16 ayongzüka agiba Activism against Gender Based Violence tembangba sentong Longleng nung December 10, 2024 nü agidang tetsürtem walkathon nung shilem agiba noksa nung angur.

Dimapur, Luchii/December 10 (TYO): District Administration, District Hub for Empowerment of Women (DHEW) & Sakhi-One stop centre tawabangba kübok Phom nunger tetsür tentet tulutiba, Phomla Hoichem den lungjemer "Toward Beijing+30: Unite to end Violence against Women and Girls" omen dak ajemdaker anogo 16 tashi Activism Against Gender Based Violence nung shilem ka ama sentong balala agia arua liasü.

Iba mapang International day for elimination of violence against women tenzü, Social Welfare Department kübok tongti inyaksangshir den shisadokden senden agia, social media aser poster campaign ayongzüka aser Namsang aser Tamlu Block Sadar nung advocacy campaign ayongzüka liasü.

Hopta tepiyong agia aruba

campaign tembangba sentong ka December 10, 2024 nü Lempong Traffic Point nung ayongzüka aser iba sülen nüburtem nem awareness agütsütsü aser tetsür-tebur telesa nung ajemdaker mapa tamajung inyakba anema lungjemer nokdaksü nükjidong nung walkathon ka ayongzüka liasü.

Iba sentong nung Additional SP Longleng, Hiatwa Iralu ajanga jembidang stakeholders ajunga dang tetsür anema mapa tamajung inyakba ajunga azüoktsü ayongzüka liasü.

Paisa department dang nungdakba nung yaritsü ajungshi aser aibelener atema ozüing aser talenba indanga tongmelang agi rasaa ashi.

Women Secretary, PBCA, Anghbenla Phom ajanga tetsür temi yimjak aser mapa inyakba tesem nung timtem balala ajuruba indang jembia aser

tetsürtem pei kidanga kumzüka mali, ta ashi.

Lai stakeholders aser ochi angateter ajunga dang tetsür dak iba ama mapa tamajung inyakba anema nokdaksü ayongzüka liasü.

"Tetsürtem ya tebilemtsü ka ama masü saka lokti nung tashi aser tongtoret ka ama züingshitsu," ta laisa ashi.

Taoba ENWO tir A. Shamthai-ia sentong nung adener dang külemi inyaksü, yariteptsü, lungjemtsü aser tetsür temeden angateta temelenshi arudaksür akumtsü ayongzüka liasü.

Case Worker OSC, Longleng, Shandimoinyei-ia sentong nung Human Rights Day indang rateta ashi.

Sentong ya vice president, Phomla Hoichem, Apei Phom lenisüba kübok agi aser Phomla Hoichem tir Ainyu-ia melepzüing o jembia liasü.

Advisor to CM, Abu Metha-i Media Facilitation Centre semdang

Dimapur, Luchii/December 10 (TYO): Advisor to the Chief Minister & Chairman, IDAN, Abu Metha-i December 10, 2024 nü Kisama nung lapoka aliba Media Facilitation Centre semdanga Naga Heritage Village nung Hornbill Festival mapang tajungtiba nung awajema osang abentsü asoshi asameyanga aser media nung inyaker ajangzüksü atema sensaksema liasü.

Iba mapang Metha-i Department of Information and Public Relations (DIPR), Doordarshan Kohima aser nija

media outlets nungi osangbener temi nungdakba aser tayongzüka balala ajuruba angatetsü nükjidong nung sensaksema liasü.

Osangtsüsang agitepba nung media ajanga tongti shilem agiba nung tali rangloker Advisor ajanga mapa junga inyaksüsa ki o jen agütsütsü nungdakba shia liasü.

Iba mapang Department of Information & Public Relations atema tesem tajung ka den senden amentsü aser osangbener den jembitsü asoshi Conference Hall nungdakba,

osangbener atema media box temeja nungdakba aser Hornbill Festival mapang kisung masü saka küm piyong media coverage shidak agütsütsü asoshi facility tali nungdakba jembia liasü.

"Kisama nung sayuba sobaliba tajung den nübur sendakteptsü asoshi media yagi tongtipang shilem agir. Parnok taginüba awajemtsü onoki bendanga agütsür inyaker aser mapa takok ngua shidak inyaksü asoshi nungdakba resources agütsütsü," ta Abu Metha-i ashi.

DC Kohima ajanga traffic totuyuba kar agütsü

Dimapur, Luchii/December 10 (TYO): Kohima Night Carnival mechi Deputy Commissioner, Kohima ajanga traffic ozüing kar sangdonga aliba den bendenloksema Phoolbari Junction (South) nungi New/Old NST route ajanga Razhu Point (North) leni aoba lenmang nung

nikongdang 4:00 ako nungi 9:00 ako tashi hari mesenzütsü tenokdangba agüja aliba ya December 11, 2024 tashi atsülangshiogo.

Ajisüaka taoba mapang metetdakja aliba ama temelen senzütsü lenmangtem akhi ama shidak alitsü, ta sangdong ka ajanga ashi.

Hornbill HIPFEST nung takok angur nem Kisama nung sempet agütsü

Dimapur, Luchii/December 10 (TYO): Hornbill HIPFEST nung takok angur nem sempet agütsüba sentong ka December 10, 2024 nü Naga Heritage Village, Kisama nung ayongzüka liasü.

Iba sentong akhumdong Director, Department of Art and Culture, Adela Moa ajanga takok angur nem tenüingsang agütsü aser tetetzü aketba tebur tajung noksa ngua pelar ta ashi.

Noksa shiai otsü ka-ka ashir, aser Hornbill Festival nung adener temi Naga nunger takum, sobaliba aser yimsüyimpong indang angazüksü, ta ashi.

DIPR ajanga iba sentong sponsor asüba atema lai pelaba lemsatop aser küm shia iba sentong tuluba akumtsü imlar ta ashi.

Lai iba sülen takok angur nem kulizüing kakat den sempet agüja liasü.

HIPFEST 2024 tetoktepba nung Ato Mor-i mezüingbuba jenjang ngutet, Viketso Meyase aser Parvej Akhtar nati tanabuba aser tasembuba jenjang nguteta liasü. Takok angur nem kulizüing kakat kaka den sempet sen 40000, 25000 aser 15000 agüja liasü.

Category awards nung Keyi Putlang-i Best Portrait category sempet angur, Sashikala Jami-i Best Landscape Photograph sempet angur aser Neilar Mepfhuo-i Best Wildlife Photograph sempet ngua liasü. Sub category nung takok angur shia nem kulizüing kakat den sempet sen 10000 agüja liasü.

Tetendanger tem tenüing nung Photo journalist Kekhriezhazo Miachieo-i jembidang noksa tem ya lenla asem - lighting, depth aser compositon - nung ajemdaker tendang aser noksa tajung aika nungi takok angur shimtsü kanga tasak liasü ta ashi.

Ababe Ezung, Proprietor, Potrait Studio ajanga jembidang shilem agirtem dang pelaba lemsatop aser nisung ajak takoker liasü ta ashi. Paisa iba sentong co-host asüba atema Department of IPR dang pelaba lemsatop aser yamaji lungjemer inyakba ajanga tarutsü nung HIPFEST tuluba aser tajungba akumtsü imlar ta shia liasü.

HIPFEST 2024 nung shilem agir shirnokisa kulizüing kakat monguteti ali, parnoki pei indang kulizüing kakat ya Dimapur nung City Tower anasa Potrait Studio nungi meshitsü akok.

Kohima nung December 12 nü "In Excelsis Deo" youth concert alitsü

Kohima, Luchii/December 10 (TYO): Chakhesang Baptist Church Kohima indang Youth Ministry ajanga tenlaki tasen yanglutsü asoshi senotsü lenmang bushia December 12, 2024 nikongdang 5:00 ako nungi Capital Cultural Hall, Kohima nung "In Excelsis Deo" omen nung ajemdaker concert ka ayongzüksü renema lir.

"In Excelsis Deo" ya Tsüingrem nem tematiba tetushi agütsüba lir.

Iba concnet nungya

Cornerstone CBCK, Prime Timers, Seyievinuo Chüzho and Rose Vero feat Ethereal Verse, aser special guests - Fifth Note, Sweven, Colored Keys, aser Project Psaltery nungeria shilem agitsü.

Iba concert ayongeris nung ajak pelashishia jaoker aser ticket ya concert anogo iba tesem nung angutsü, ta sangdong ka ajanga ashi. Osang tali tejangjaba metetner temi 8118925209/ 8258044199 nung tongteprateptsü akok.

Secretary, Social Welfare Dept. ajanga Shamator semdang

Dimapur, Luchii/December 10 (TYO): Secretary, Martha R Ritse, IAS lenisüba kübok Social Welfare Department nungi telok kati December 7, 2024 nü Shamator District kübok institutions balala semdanga liasü.

Iba mapang lai sorkar department, nübur lenirtem, NGOs, kin lenirtem aser DLC nungi teshimtet nisungtem den shisadokden senden mena liasü.

Tetsür aser tanur nem teyari agütsüba tashi itshitsü nükjidong nung iba senden ya mena liasü.

Parnoki kasa mapan District Hub for Empowerment of Women (DHEW), CDPO Office, DCPO office, One Stop Centre (OSC) construction site aser Veterinary ward nung Anganwadi center semdanga liasü.

Secretary ya meina Additional Secretary, Bodeno S Colo; Director, Social Welfare Department, Tosheli Zhimomi aser Department of Social Welfare aser DHEW nungi ketdangsürtem oa liasü.

NAGALAND POLLUTION CONTROL BOARD							
Signal Point, Dimapur - 797112, Nagaland Tel: 03862-245727, TeleFax: 03862-245728 Website: www.npcb.nagaland.gov.in e-mail: npcb2@yahoo.com							
AMBIENT AIR QUALITY FOR KOHIMA AND DIMAPUR CITY							
KOHIMA ASER DIMAPUR NUNG MOPUNG MERÜK-MEMERÜKBA JENJANG							
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaksütsüla"
				03.12.2024	05.12.2024	07.12.2024	
1	Dimapur	Bank Colony	Residential	150	178	195	100 µg/m ³
2		Dhobinala	Commercial	191	189	205	
3		NPCB Office, Signal Colony	Residential	163	174	182	
4		Tenyiphe, Chumoukedima	Commercial	92	127	138	
5		Nagarjan	Residential	168	173	186	
6		Viola colony	Residential	128	130	176	
7		Burma camp	Commercial	184	216	199	
8	Kohima	Opposite NST Office	Residential	34	60	83	
9		PWD Junction	Commercial	94	113	145	
10		High School Junction	Commercial	150	158	183	
11		Midland (Upper)	Residential	71	71	106	

Iba osang ya nüboritem ajangzüksü atema Nagaland Pollution Control Board-i agütsür.



Bengaluru nung Lok Sabha election atema Vijaya Sankalap indang election rally nung Ato Kilonser Narendra Modi aser BJP lenir S M Krishna na tangokba noksa nung angur. Krishna shiba taoba union minister aser Karnataka chief minister liasü pa December 10 nü par kidang süogo ta par kinungertemi metetdaksü. Pa arishi küm 92 liasü.

Kolewadi gram sabha-i ballot paper amshitsü telemtetba agiogo

New Delhi, Luchii/ December 10 (Agencies): Maharashtra nung Satara district kübok Kolewadi gram sabha-i, tarutsü nung election tem nung ballot papers amshitsü telemtetba agiogo aser iba ajanga iba yimtsüng ya EVM mamshitsü telemtetba agiba tanabuba yimtsüng kümogo. Yimtsüng ya Karad (South) assembly constituency kübok aiter koba taoba mapang Congress lenir aser taoba chief minister Prithviraj Chavan indang constituency liasü. Pa November ita election nung BJP candidate Atul Bhosale-i vote 39,355 agi koka liasü.

Kolewadi nung alirtemi EMV tem ajanga vote agütsüba dak tamang mekatetba lemsatepba sülen iba bangzüng ya agizüka liasü. EVM tem dak tamang makai Solapur nung Malshiras constituency kübok Markadwadi yimtsüng nung alirtemi ballot paper amshia mock "re-polling" ka agidangba sülen anogo ishika lir tang iba bangzüng ya agizükogo. Yimdaklirtemi ballot papers amshia mock election agidangba ya administration aser police-i nokdanga liasü aser iba sülen ken o kar benoka liasü. "Tarutsü nung election tem EVM mamshi-i ballot papers

ajanga vote agütsütsü atema Kolewadi gram sabha-i bangzüng ka agizükogo," ta yimdaklir kati Mongolbarnü ashi. Paise, nüburttem takhangba dak ajemdaker Election Commission-i ballot paper ajanga vote agütsüba inyakyim benoktsüla, ta ashi. "Ballot paper amshia election agi nungdang Kolewadi nung alirtemi vote agütsütsü telemtetba agiogo. Tarutsü nung election agiba mapang EVM tem amshira onoki vote magütsütsü," ta pai ashi. Administration-i ballot papers nung vote agütsütsü memelara onoki election nung shilem magitsü.

Kejriwal-i auto anishirtem nem insurance lakh 10 agütsütsü nangzük

New Delhi, Luchii/ December 10 (Agencies): Aam Aadmi Party national convenor aser taoba Delhi chief minister Arvind Kejriwal-i Mongolbarnü, linük yimtiba nung auto anishirtem atema sen lakh 10 alang life insurance scheme ka sangdongogo. Taruba Assembly elections magi tsüngda tenangzükba balala agütsüba nung iba tenangzükba ya-a ka liasü. Auto anishir ka den par kidang chiyongba sülen Kejriwal-i iba osang ya X ajanga metetdakja liasü. Pa indang post nung pai, Delhi nung AAP puri sorkar küm tetra auto rickshaw anishirtem atema inyaksütsü tenangzükba pongu agüja liasü.

Tenangzükbatem rongnung auto anishir shia nem Life insurance sen lakh 10 tashi aser accident insurance lakh 5 aser jalatem kiyimtsü atema sen lakh 1 agütsütsüba densema lir. Maneni tenangzükba nung uniform atema küm shia sen 2500 anaben aser competitive tatidang atema renema aliba

tanurtem indang coaching taah agütsütsüba aser 'Pucho App' tenzükshitsüba densema lir. Onoki taoba mapaga parnok yariogo aser tarutsü nunga maneni yaritsü, ta pai zülutsü. Election atema AAP puri nüboyimba sentong asendenshir agiba mapang tang pai iba tenangzükba ya agütsüogo. Kasa mapang nung Hombarnü Arvind Kejriwal-i auto anishirtem süngo ajemtsü atema par kidangi jaoka liasü. Kejriwal-i auto anishirtem den süngojemba indang X ajanga lemsatepogo. "Tanü ni auto anishirtem süngo ajemtsü atema ozü kindangi jaok aser parnok den satok satoka sensaksemogo. Parnok den tepela aser tebilemstütem lemsatepba ya ni atema kanga tongtibang liasü. Ni parnok den tesendaktep tajung lir," ta pai zülutsü. "Tia tensa ajak nung onok kati ka yaritepa aruogo. Parnoki kanga meranga inyakba ajanga ni teti ajungmesor. Onoki parnok atema inyaka aruogo aser tarutsü nunga maneni inyaksü," ta pai ashi.

Aluyimer 101 Dec 14 nü Delhi leni jaja aotsü: Pandher



Chandigarh, Luchii/ December 10 (Agencies): Punjab nung aluyimer lenir Sarwan Singh Pandher-i Mongolbarnü ashiba agi, longkak aita aliba aluyimertemi maneni longkak aita December 14 nü tetsüng agi Delhi-i jaja aotsü, kechiyong sensaksemstü atema sorkari tang tashi kecha osang agüja mali. Mongolbarnü Kisan Morcha aser Kisan Mazdoor Morcha na senden amenba sülen iba telemtetba agia liasü. Shambhu arrtsü nung longkak aita tesem nung osangbenertem den sensaksemba mapang Pandher-i, "lenmang ka bushitsü atema aluyimertemi sensaksem maginer ta aluyimertem dak tai metonglokdaktsüner. Onoki mapang agütsüogo. Ajsüaka sorkari sensaksem atema kecha osang magütsü," ta ashi.

parnoki Mongolbarnü sensak asemstü. Longkak aita aliba aluyimertemi Deobarnü Shambhu arrtsü nungi longkak aita Delhi-i aotsü sentong yanglur aliba thitsü. Haryana security personnel temi teargas khaloktsüba ajanga nisung kar yiruba sülen parnoki iba longkak aita sentong ya thia liasü. Kasa mapang nung aluyimer lenir Jagjit Singh Dallewal-i tasü tashi lumitsü telemtetba agir tenzükba anogo 15buba jungogo. Ano aluyimer lenirsa Abhimanyu Kohar-i Khanauri arrtsü nung longkak aita tesem nungi osangbenertem dang ashiba agi, taoba anogo 15 tsüngda Dallewal tashi mait kümogo aser jajatsü atema-a teyari nungdaker. Khanauri nung aluyimertemi Dallewal pusema Mongolbarnü sorchiok masü, ta paise shisem. Kasa mapang nung Pandher-i aluyimertem dang December 13 nü longkak aita tesemi aika arutsü mepeshia metetdaksüogo. Shambhu aser Khanauri nung longkak ait tenzükter ita ter ajunger.

INDIA bloc MP temi VP mapa nungi agintsü motion benok



Jagdeep Dhankhar

New Delhi, Luchii/ December 10 (Agencies): INDIA bloc nungi Opposition züngsemtemi Mongolbarnü Vice President aser Rajya Sabha chairman Jagdeep Dhankhar mapa nungi agintsü atema notice ka benokogo. "INDIA telok nungi party tem ajaki Rajya Sabha mendenbuba anema no-confidence motion formally benoktsüsa kümogo, kechiyong pai Council of States inyakyim ya party dak rangloker bendanga inyaksangshir," ta Jairam Ramesh-i X nung post ka ajanga ashi. Motion ya Rajya Sabha indang Secretary General nem

agütsüogo, ta paise shisem. Vice president ya Rajya Sabha indang ex-officio chairman lir. Constitution kübok Article 67 (b) nung Vice-President ya Rajya Sabha nung bangzüng ka agizüka Lok Sabha-ia agizükra pa mapa nungi agintsü akok, ta shia lir. Iba provision nungsa MP temi menden anema bangzüng ka benoktsü tebilemba aliba indang anogo 14 jelia lia metetdaksütsüla ta shia lir. Iba jenjang agiba ya takok angutsübo mimlar, kechiyong House anaprongla nung INDIA bloc züngsem tajemba lir. Opposition lenir rongnung kati Parliament kima ashiba agi,

iba motion ya nisungba anema longkak aita temaitsü benokba masü saka institution aser menden kümzüka ayutsü atema benokogo. Lenir yagisa, mendenbubai ken o balala benoktsü atema Opposition nem temelaba magütsüba ya tebilemstü ka lir, ta ashi. Paise, party balala nungi floor lenirtemi iba motion nung sign süogo ta ashi. Lenirtem rongnung Nadimul Haque and Sagarika Ghosh from the Trinamool Congress; Aam Aadmi Party nungi Sanjay Singh; Shiva Sena (UBT) nungi Priyanka Chaturvedi nung densema lir. Biju Janata Dal (BJD)-i motion nung sign masü. BJD tekolakba Naveen Patnaik-i Odisha nung osangbenertem dang ashiba agi, par party-i INDIA bloc-i Dhankhar anema motion benokba dak sendakba nung kecha telemtetba agia mali. Rajya Sabha nung par party nungi MP tenet lir. "Onoki ken o asadangdar. Jenjang kechi agitsü nungdaker aji onoki agitsü," ta Patnaik-i ashi. 2022 küm BJD puri Vice President mapa atema Dhankhar pusema liasü.



TIR YIMYIM YIMOBILEM (EDITORIAL)

DIMAPUR RASEMNÜ, DECEMBER (LUCHII) 11, 2024

Syria rara anener asü, tenzüker ?

Küm 24 tashi yimten tashi tulu amshia nübortem tsübudakja yimsü süa arur, pei lima aser pei ki toktsür pi bendang lima bushia ajentsüsa akümba Syria tir, Bashar al-Assad yimli laobaji, Syria lima nung Syria nunger o Syria nunger na tsüngda rara anener asütsü asü mesüra ano parnok o parnok na tsüngda rara tasen tenzüksüar ashitsü makokba tensa tia ka nung Assad anemer telok tetsütiba Hayat Tahrir Al Sham (HTS) teloki anir Syria yimli atsüngtetogo. Asenok Naga nunger ama, Syria nungertem rongnunga Assad anema apusor yimten telok balala ter dak tali lir aser item rongnung tashitaittibaji HTS telok ya lir. Iba teloki aniba telok aika rongnung Ahrar Al-Sham telokibo Syria lima nung ya Sharia ozüng amshia Muslim lima temeja ka kümner. Iba jagi tang ya Syria nung Khristan-tema kanga shisaboluba tia nung lir. Atangji, tang Russia nung oa jenokba taoba Syria tir Bashar al-Assad-i 2000 küm nungi 2024 küm tashi, küm 24 tashibo yimsü süogo saka pa jakdang pai melenba Syria tirjia tangar masü saka tebu Hafez al-Assad liasü. Pa yagia Syria nung 1971 küm nungi 2000 tashi küm 30 yimsü asü, anungji Syria lima ya taoba küm 54 Assad-er kibongi dang yimsü süa aru. Syria nung Assad-i yimsü asüba mapang tajung kaji Syria lima nung Muslim yimsü dang alitsü ta masü saka tanga tamangba yimsüa den amangtsü asoshi temelaba agüja liasü saka ano külen Assad yimsüsüba mapang pa anemertembo olaa madokdaksüi miim aketba mozü tango dena amshia tepsetba otsü lir. Ashiko, kibong kati dang küm 50 dak tali yimsü süa arudangji, joko Syria limaji Syria nunger meyong masü saka par kija meyong amai bilema par sünütsüsa yimsüsüa alitsü. Iba jagi Assad yimsüsüba anema nübortemi 2011 küm apuso saka Assad-i tashiyim amshia parnokji nokdang aser mim tango amshia tasüa südaktsü. Iba jagi Assad pu asemer o anemer na tsüngda, Syria nunger o Syria nunger tsüngda rara tulu adok. Iba rara nung Syria nunger lakh 5 dak tali asü aser item rongnungji teimbaka tai maketba sensosangertem liasü. Iba mapaji anema Unites States aser European Union-temi dang masü saka Arab League nung dena aliba Muslim kintem teimbakati ola adok. Iba nung jagi tenzüka Syria nung Assad government anemer telok balalai Syria lima tesem tesem nung yimsüsüa aru. Aji oda, Bashar al-Assad-i Syria lima ajunga ayimbanga yimsü mesüret. Iba ama mapang ka nung Syria lima asoshi Iran aser Russia nungi teyari aru aser parnok teyari ajanga dang nübortemi maginüaka taoba küm ter dak tali Assad-i tashiyim amshia yimsüsüa aruogo. Ajisüaka, tangbo Ukraine den raraba agi Russia-ia Syria nung Assad yimli mekümzüktet südi aser Iran-a Israel nungertemi Hamas telok anema raradang amokmerenba agi Syria nem teyari magütsütet südi. Ajisüaka, Assad nembo Russia-i tejenokdakbo agütsüogo. Aji oda, tang Assad yimli atsüngdoker Syria yimten melena abener telok HTS purtem asoshi Syria nunger Assad yimten anema rarar telok ajak tangatettep kati arudaktsür Syria yimten tasen ka akümstübjaji mapa kanga tasak asütsü. Atangji, parnok asoshi tajung kaji tangbo tangar bendanger kin tulutem shingai Assad telok masemer aser parnoka manemer. Aji oda, tang US tir mapa agizüktsü alisang, Donald Trump-ia tangbo Syria nung US pur mapa kecha mali, anungji shinga pu sema aser shinga anema shilem magitsü ta metetdakja lir. Syria ya Israel kidanger aser akhidang nungi tsükchitepa aliba kin, ajisüaka tangbo tsükchitepba osang mangashir. Ibaji Syria wainshin dak keta lir. Syria nung Assad yimsüsüba aser yimsü süasüa pei lima nunga melitetsüsa tetsübu nung ajentsüsa akümba tatalokba nungji asenoka tangazüktsü lir. Aji oda, Syria-a Naga lima ama, tangar yimten kübok melii yimten nüchisobo aginer saka telokbo paikaya küma lemsar alir. Item nübortem asoshibo pei lima nung asüyonga pei sobaliba, pei oshi ase pei yimten temeten dang ngurbo, tangajibo tangar den lemsatepa külemi aliyonga, ajisa tajungba asütsü.

OLEMSABANG

TIYAZÜ TESAYUBA AGI MASHILENI MANIDAKTSÜTSÜ KÜMDANGA MEITA LIDI

- L. Kika Pongener.

(Yashi adok nungi...)

Laishiba nung züngra, Yisu-i shiogo..."Lenmang atangji aser taküm ni lir. Ni ajanga mesura shianga-ia kübu dangi marur" (Yohan-14:6). Yisu Khrista majangi shinga tebu dangi aotsü makok. Tetezü... Yisu Khrista majangi shinga kodaki aotsü makok...ta tejangja shia angur. Shirnoki Yisu Khrista-ji kü kümtekdakba aser Kibur ta tebang agi nangzüker aser temulong nung amanger aser tzü nung baptir, parnokji dang tekümtet angutsü, aser shirnok tekümtet aka, parnokji dang kodaki aotsü. Yisu-i Nikodima dang ashi..."Atangji züngpong ni ne dang shidi...Nisung kati tzü aser tanela nung mesora Tsüngrem yimli aitsü makok" (Yohan-3:5). Anungji tamang yimsu kobaisa...Yisu Khrista-ji kü kümtekdakba aser Kibur ta nangzüker, aser temulong agi amanger aser tzü nung baptir, parnokji dang Kodak yimli-i aitsü...Saka tamang yimsu kobaisa Yisu Khrista-ji kü kümtekdak aser Kibur ta menanzükteter/magizükteter, parnokji kodaki aotsü makok. Yisu-i ashi..."Shibai kikümbang ajanga maiti, tangalen kati san kidangi aiter, pa auer aser rakzükrakter" (Yohan-10:1). "Ni kikümbang, ni ajanga shiri aiter pa kümzüksü aser aitli tuguli ta asütsü aser chiyungtsü angutsü" (Yohan-10:9). Atangji, Yisu-i ashiba ama...Yisu Khrista majangi shinga kodak yimli senmang mangutsü. Mapa tajung inyakba agia tekümtet mangutsü, mapa tajung yabo limapurtemi tajungba inyaker, saka mapa tajung inyakba agia Kodak yimli senmang mangutsü.

Ano tiyazü tesayuba ka sayutsüngiba yamai angazük...Alima nung taküm alidang timtem, toudhi, tekangshi kecha makai jangradema lirabang aji Kodak...Aser alima nung taküm alidang timtema, okrongseta aser ala-ashia lira ibaji molumi...Nisung ka kodang suadokdir (Dead) aji tatempang. Sur külenbo Kodak-a mali aser Molumi-a mali...ta tiyazü tesayuba ka sayutsüngiba angazük. Laishiba nung Luke-16:19-31. nung züngra...Takar nisung ka liasü, shibai su tanük aser sentsüprang suoshi sobur, kenua-mati benjong yanglua liasü. Aser meshimetsür ka tenung agi Lazar liasü. Aser takarsang'er langpang nungi tsükba chiyungtsü tanük-tari achitsü pai ata-a liasü. Kenu anogo meshimetsür aser Takar-sang tena prongla külemi asü (Death). Meshimetsür-sangji Tenyartemi Abraham teküi bener ao. (Kodaki ao). Takar-sangji asüyim nung (Molumi) nung kangshia alidang, pai tenuk rangketa yoknung kodak nung Abraham tekü nung Lazar ajunger angu. Anungji iba otsü nung, takar-sang sur külen indang-indanga molumi-i ao aser molumi nung milak agi rongka kangshia aliba küli tejangja angur. Aser Lazar kodak nung Abraham tekü nung ajunger aliba küli tejangja angur. Anungji 'Kodak' aser 'Molumi' shitakba kar....ta iba laishiba nung küli tejangja angur. Tsüngrem o-i ashir..."Asenok joko tanür ama malitsü, mesura tesayuba mepong shia agi meinzütsü, mesura nisung tekolak sangrasangji agi, aser aibelena tiyazü sayuba agi ina oli aruli ta masütsü" (Efesa-4:14). Anungji asenok tiyazü tesayuba agi mashileni manidaktsütsü asoshi kanga kümdanga meita lidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria indang Benue & Taraba states nung tamanger 95 shi tepsetogo

Abuja, Luchii/December 10 (Agencies): Nigeria tiyonglen Benue state nung November 24 aser December 1 tsungta Fulani shiruru metsürtemi Khristanpur 48 tepset, ta osang balala ajanga ashir.

Azege village, Logo County nung December 1 nü tamangertem tekülem kidangi aodang prangbong bena alirtemi tetsür aser tanur densema nisung 18 tepset aser November 24 nü Logo aser Katsina-Ala counties nung 30 tepset, ta yangji alirtemi Christian Daily International-Morning Star News dang ashir.

“Fulani shiruru metsürtem nok-nü tesashi amer Khristanpur dak injang khaloktsü, kar nok agi leplet aser parnok indang alu nung aonsotsü raksatsü,” ta Logo Local Government Council nung taoba züngsem Benjamin Uzenda-i ashir.

Yimdaklir nisung 18 tekülem kidangi aoba mapang “armed herdsmen” südi ta temulung melemi alirtemi tepsetba atema Nigeria indang National Assembly nung Benue state nungi Senator Emmanu-el Udende-i December 5 nü sasaba lemsatepa liasü.

“Shiruru metsürtemi iba ama azüdokshiba maneni mazüok yutsür, tensa mejungi kumdaktsür, timtem agi kongshir aliba tesem nung tesunep aser rongsenketzüng aser loktiliba tashi mait kumdaktsür,” ta Udende-i ashir aser October 22 nungi shiruru metsürtemi Ayilamo nung atsüka atar nisung 15 tepset, Anyiin nung 25 tepset aser Uzer yimdak nisung trok tepset ta ashir.

“Item tesemtem nung tanen makai nüburtem kumzuka meyutetba ya 1999 Constitution (as amended) indang section 14(2)(b) kübok shia aliba den khenyongi mapet, kong sorkar asoshi tongtipangtiba teinyaktsüji nüburtem kumzuka ayutsüba shia lir,” ta Udende-i ashir.

National Assembly nung Benue state nungi Senate Minority Leader Abba Moro-ia nisung tepsetba ya bushisüngdangtsüla ta ashir.

“Kechi ataloker, aji asenoki angatetsü nungdaker. Iba tebilemtsü tera tonga metettsüla, kechiaser ibai asenoki anguba ama tongmelang masü,” ta

Moro-i ashir.

Senator Victor Umeh-ia shiruru metsürtem tenüng asen aser ketdangsür temi azüdokshi soita meyutetba atema jashiba lemsatep.

November 24 nü noknü bena aliba Fulani shiruru metsür 300 dak tema arua Logo aser Katsina-Ala counties nung Khristanpur timba aliba tesem amak, ta yangji lenir Joseph Anawah-i ashir.

“Parnoki ozü nübur dak tesem ajaklen nungi amak, tenük agi angur dak injang khalokja tamanger 30 tepset,” ta Anawah-i Christian Daily International-Morning Star News dang ashir.

Logo Local Government Council indang chairman Clement Kav-ia nisung 30 asüba jangjatsü aser ano nisung 37 yiru ta ashir.

Benue State Police Command indang odongtar Catherine Anene-i Christian Daily International-Morning Star News dang, “Benue state nung tesem kar amakba ya shidak, saka police aser danga security agency temi item azüdokshi anendaktsütsü asoshi nungdakba mapa ajak inyaker,” ta ashir.

Anasa Taraba state nung prangbong bena alirtemi pastor ka aser tetsür ka indang ki rakpoka tenaprong tepset ta ashir.

Taraba state yimtiba Jalingo nung December 6 aonung prangbong bena alirtemi Pastor Clement Anthony’er ki aser kidanger kaketsür Titi Edward’er ki rakpoka ai ta ketdangsür temi ashir.

“Tetsürta ya tatidang asoshi lesson zünga aliba mapang la indang takdang nung khaset. Injang ya la terongdong nung khaloktsü aser tepoklen nungi toko,” ta Taraba State Police Command indang odongtar Usman Abdullahi-i sangdong ka nung ashir.

Pastor ya par kidanger indang compound nung khaset, ta pai ashir.

“Ajisüaka prangbong bena alirtemi nisung shinga pua bener mao mesüra parnok azüdokshidak nungi sen mesüra osettsüset bener mao,” ta Abdullahi-i osangbener dang ashir, anungji lendong agütsür ya Islamic extremists südi ta bilemer.

Taraba state nungya shiruru metsür aser danga kiralongrar temi azüdokshiba lir.

Wukari County nung December 5 nüa Taraba state Governor Kefas Agbu, tamanger, tetsü Jumai Kefas aser teyi Atsi Kefas na Kente Road nung senzua alidang injang khalokja yirutsü, ta Wukari Local Government Council indang chairman Dauda Samaila Agbu-i ashir.

Alima nung Khristan yimsü amangertem asoshi tamajungtiba linükji Nigeria ya lir, kong October 1, 2022 nungi September 30, 2023 tsungta tamangba yimsü mechi nisung 4,118 tepset, ta Open Doors’ 2024 World Watch List report nung shia lir. Khristanpur pua bener aoba ya danga linük dang nungi Nigeria nung timba (3,300) lir.

Tekülem ki aser Khristanpur-i yangluba mozüki, school aser leper amala raksatsüba nunga Nigeria ya jenjang tasembuba (750) nung lir ta ashir.

ANOGO ABEN TSÜNGREM DEN

Satan tamakok

“Aser tongtibang aser aintem rakzüker, item madak takokba küma Pai itemji jungkai adoka sayuogo”. Kolosi 2:15.

Yisu asüba, shia aruba, aser Kotaki atuba ajanga kanga tongtibang tatalokba ka Pauli zülu. Asenok Khrista nung dang taküm lidaktsü masü, saka satan tamakok angu.

Satan “tamakok angu süra kechiba asenoki tali takok angutsü? Tiyazü madak. Molusongzü ama satan ain adoka senzür. Pa tashi ajak makai kümdaktsür. Saka Pai na külakoktsütetra Pai na azüoktsü. Pai Khristantem tasüba nung menaloktsür!

Khrista Pa tashi asenok nem agütsüba tetezü amang yimli dang Khristai alima nung ajak azüoker ta kuli asütsü atema agütsü. Pauli ajabaji Tsüngremi miima akaba jungkai adoka alima dang sayutsü atema aja ta zülu Ef. 3:9-10.

Asenoki Khrista takokba koda kuli asür? Amang yimli dak asenoki amangra asenoki alima nung Tsüngrem mapa koda inyaktetsü? “Tamajungbai asenok dak arüloktsür”. Tsüngremi langzür, ‘ni ajak inyakogo, aser inyaktsü. Ni kangki nung satan koktetogo.”

Pakistan nung sor Goa nung alir tamanger ka nem Indian senso agütsü



Tamanger Shane Sabastian Pereira ya Karachi nung sor ita pezü sülen Goa-i aru aser küm 43 lir Mongulbarnü India senso agütsüogo.

New Delhi, Luchii/December 10 (Agencies): Karachi nung aser Shane Sabastian Pereira ya sor ita pezü dang lir Goa nung par tetsü-tebour nung aliba yimsüng ka nung alitsü atema India-i aru, saka Indian senso angutsü atema küm 43 agi.

Mongulbarnü Goa Chief Minister Pramod Sawant-i Pakistan nung asosang tamanger nem Citizenship (Amendment) Act kübok Indian senso akumba kulizüng kaketsü amokja liasü.

Tzükum nung aliba state nung iba kulizüng kaketsü angur rongnung Shane ya nisung tanabuba lir. Mezüngji ano Pakistan senso Joseph Francis Pereira nem taküm August ita Indian senso agüja liasü.

Shane ya Anjuna, North Goa nung aliba Demello nungi lir, aser par tsürabor ya

Karachi-i ao, kong pa 1981 küm August ita aso. Pa sor ita pezü lir par kibong tanaben Goa-i meyipa aru, kong pa school azüng. Pa ya 2012 küm Indian senso Maria Gloria Fernandes den kibong akum. Pa India senso akumtsü asoshi küm aika meranga arur tamakok ajurua liasü ta pai ashir.

“Tatamsa Joseph (Pereira) otsü agi ajungmesoa ni ano senso atema tezüluba agütsü,” ta pai ashir.

Kulizüng kaketsü nung Shane ya India senso ka ama Citizenship Act, 1955 indang section 5(1)(c) kübok shia aliba nung temsüa section 6B kübok Indian senso ka ama tenüng zülüoka lir, aser ibaji pa India-i aitba anogo nungi alitsü.

Sentong temer osangbener den jembidang CAA ajanga Goa nung alirtem ajangzüksü

indang tasüngdangba tem chief minister-i langzua liasü.

“Goa nung alir iba kulizüng kaketsü angur Shane ya tanabuba lir, aser dangara aikati meshia lir aser parnok indang application tang repringshimba mapang lir,” ta pai ashir aser CAA yagi Goa nung alir aika ajangzüksü ta shisem.

CAA kübok Shane-i senso akumtsü atema application agütsüba ita asem tsungta agizük, ta Sawant-i ashir.

Ato Kilonser Narendra Modi aser Union Home Minister Amit Shah nungeri iba Act mapa kuma amshitsü telemtetba agiba ajanga Pakistan, Bangladesh aser Afghanistan amala linüktem nung taolen maka anendaka aliba Hindu, Khristan, Jain, Parsis, Buddhist aser Sikh nungertem yaritsü, ta pai ashir.

AO OSHI ANGAZÜKDAK:

TANÜ ANGAZÜKTSÜBA OJANG

Tatembanglak (adv) süngküm, süng mesüra sünglang tatemlen, (top part of a tree or edge of a platform) * Süngdong tatembanglak nung ozütem arua atemer. Tatembangtsü (adj) ozü sangnu aputsü yangluba, lungnen (trap) * Kidang koya aputsü asoshi tatembangtsü yanglur toktsü.



Tir Yimyim

OLONG PAITEP # 7007

Grid for OLONG PAITEP # 7007 with numbers 1-16 in various cells.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7006 TELANGZÜBA


TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



December 10, 2024 nü Indian Army Service Corps Motorcycle Display Team (Tornadoes) ajanga world record asem tashi yanglutetogo. ASC Centre & College aser Bangalore-Chennai Expressway nung 264th Army Service Corps Corps Day tenüng nung sentong ka agidang parnoki otsü asem yanglu. Subedar Pradeep SS-i "longest backward ride on a motorcycle" otsü yanglu aser pai kilometer 361.56 tashi motorcycle anir ao. Havildar Manish-i "longest basic hands-free wheelie" otsü yanglu aser pai kilometer 2.349 anir ao. Sepoy, Sumit Tomar-i "longest no-hands wheelie" otsü yanglu aser pai meters 1,715.4 tashi anir ao.

Guwahati nung kija aser teloktemi Manipur atema lungkak ait



Guwahati, December 10, 2024 (Agencies): Manipur nung den külemi noktaker ta sayua Mongulbarnü Guwahati nung shisashirtem, nungtugu nisungtem aser teloktemi ola madoki lungkak aitba sentong ka agiogo. Chandmari nung agiba sentong nung Manipur nung pusema nungitba aser tensa süngjemtsü takhangba agütsü. Iba sentong ya International Human Rights Day den külemi agia liasü.

Assam nung kaketzülurtem, shisashirtem, aser nungtugu nisung 230 adenba telok kati iba sentong ayongzuka agi. Manipur nung küm ka ser tesadang ka tashi tensa mesüngjemteti ozüng alema inyaksangshia arur. Iba ajanga nisung noklang aika taküm samaogo aser aika pei talidak toktsür ogo. Axom Nagarik Samaj aser Bharat Jodo Abhiyaan, Assam den külemi Hiren Gohain,

Harekrishna Deka, Thomas Menampampil, Ajit Kumar Bhuyan aser Dulal Ch Goswami nungeri iba lungkak aitba sentong ayongzük. Sorkari nübertem asoshi masü saka elections nung takok angutsü atema dang temulung agütsür ta parnoki tai tongloksü. Manipur nung tensa majungba ya North East kübok tanga state tem nunga belenshitsu akok ta parnokisa tebilemtsü khuret lemsatop.

2024 küm Mizoram nung TB agi nisung 147 asü

Aizawl, December 10, 2024 (Agencies): Mizoram nung January 2024 nungi tenzükur Tuberculosis (TB) agi nisung 147 süogo. January aser December 9 tsüngda samples 24,017 tendangba nungi nisung 2,164 dak TB putet. Parnok rongnung 80% tashi takok ngua

anepaluogo saka nisung 147 meküzmüktet ta Mizoram health department-i ashi. Yaküm Mizoram nung nisung 108 tashi TB agi asü. State Food, Civil Supplies and Consumer Affairs Minister B. Lalchhanzova-i 100-day TB elimination campaign tenzüksüdang arogotem, NGOs

asir loktii sorkar den yariteptsü ayongzük. Sorkari Mizoram nungi TB samatsütsü merangba nung ajaki yariteptsüla. Mizoram ya yimjung aser tesünep state ka lir saka health tsütsü tayongzükba jenti lir ta Minister Lalchhanzova-i ashi.

Guwahati nung contractor ka pur aoba atema nisung 2 apu

Guwahati, December 10, 2024 (Agencies): Guwahati nung contractor ka pur aoba atema police-i nisung ana puogo. Guwahati kübok Batahguli area nungi nisung pungui contractor pur ao ta osang angazükur. Contractor ji Noor Hussain Talukdar ta jangjaogo aser contract ka agütsütsü ta shir pa

pur ao. Iba sülen Talukdar pur aoertemi pa indang mobile phone agi par kinunger dang Rs. 2 lakh meshi. Talukdar'er kinungertemi Satgaon police station nung osang sangoktsü aser police-i bushisüngdang tenzük. Nisungpurtemi Talukdar'er kinunger dang Panjabari kübok Nabajyoti Nagar nung tesem

kati arutsü ashi aser police-i parnok dang yamaji inyaksü shisatsü agütsü. Idangji police-i Hassan Ali (28) aser Shahnawaz Alam (24) na apu. Ajisüaka temulung meleme bilemer nisung asem jena oadok. Iba dak sendakba nung maneni bushisüngdang südar aser Talukdar tsüngsü bushidar.

Tripura nung BSF-i Nigeria aser Bangladesh nung apu



Agartala, December 10, 2024 (Agencies): Border Security Force (BSF)-i Tripura kübok Indo-Bangladesh arrtsülen bendanger pezü puogo. Parnok ya Bangladesh nung aser Nigeria nung ka lir aser India nung teyariteper ka apu. Sepahijala district kübok

Kaiyedhepa nung mita aodang BSF sepaitemi arishi küm 34 tain Nigeria nung Maxwel Nweke apu. Pa ya Bangladesh telungi aitsü merangdang apu. Pa apuba sülen BSF sepaitemi Suraj Prasad ta ser India nung ka apu. Pa ya West Tripura district kübok Amtali nung alir aser pa ya

bendangertem yarir ka lir. Ano tanga tatalokba ka nung BSF sepaitemi North Tripura district nung arishi küm 15 tain Bangladesh tsür ka apu. Moulvibazar district kübok Chandpur nung lai India telungi aittsü merangdang apu. Ano, West Tripura nung BSF-i Bagerhat district nung Bangladesh nung ana apu.

Pelaba Lemsateper



ASO : 22.10.1956

ASÜ : 03.12.2024

Onoki teti meima aliba Asür N. Chubala Longkumer, meimlaba ajungben asüba mapang onok den yariteper ajunga dang ozü temulung taroktiba nungi pelaba lemsateper. Tembar, Kinunger, Kidanger, Arogo, Lokti balala aser temulunger temi yimya balala nung ozü dang temeim sayuba aser mapa tajung inyakba atema kanga pelar.

Ozü mulung zürepa jashia alidang nenoki ajaklen nungi yariba ajanga ozü mulung anisüngzüktsüogo.

Nenok kija shia dang ozüi pelaba meshitetnung sasar, saka asen Tulusang Tsüngremi nenok ajak mulamushia moatsütsü ozü sarasadem.

Teti onok mulungjang nung lir,

Temeim kinungbü, Chirnur, Semchir, Adianu, Tsürabur aser Kinungertem.

MULUNGNEN O



Asür E. NIKEN JAMIR

Aso : 20-08-1926 Asü : 03-12-2024

"Kü taochi na asoshi teperi" 2 Korint 12:9

Onoki teti meima aliba obala E. Niken Jamir shirangba aser alima nungi bilaba mapang onok den yariteper dang pelaba ashitsü o abensaa monguteter aser nenok ajak dang sentsü lir.

Ozü kidanger, tembar, kinunger, anük-apang, kiyonger, arogotem, Jamir Kidong Dimapur/Chümoukedima, Changki Süngdakba Senso Telongjem Dimapur, Diphupar Temeket Changki Senso Telongjem, Dimapur Ao Baptist Arogo, Changdang Baptist Arogo/Union Dimapur, Diphupar 'B' Ao Community Diphupar 'B' Ao Pensioner Telongjem, Diphupar 'B' Ao Baptist Arogo, Chief Instructor, AWTC & Staff, 4th Mile, DCPU Staff Dimapur dang kangasa pelar.

Onoki ano Dr. Nepuni Athikho, Mr. Along Amri aser Rev. L. Lanu Jamir nunger dang alakteta pelaba lemsateper.

Nenok kija shia dang ozüi tepela melemsatepetba asoshi kanga sasar, saka tulusang Tsüngremi nenok ajak mulamushia moatsütsü ta ozü sarasadem.

Temeim Kinungtsü, Chirnur, Anük-apang,

Mezüng semchirtem, Tanabuba aser Tasembuba semchirtem.

Israel Ato Kilonser Netanyahu okadak nokdak



Jerusalem, Luchii/December 10 (Agencies):

Israel Ato Kilonser Benjamin Netanyahu ashikülak mapa inyakba, temulung melemtetsüsa ochimashi mapa inyak ta tai tonglokja aliba ken o jembitsü asoshi tang mezüngbuba Mongulbarnü okadak nokdak aser ibaji hopta aika kuli agütsüba tetenzüker alitsü.

Netanyahu-i obendanger dang "hello" ta shi. Judge kati pa dang dangar witness tem ama pa kasa maongka lir aser amentsü mesüra nokdaksü pa mulung ta shi.

Ken o balala asem nung ashikülak mapa inyakba, temulung melemtetsüsa inyaksangshiba aser süpokrem agiba indang ken o nung Netanyahu-i telangzüba agütsütsü. Pai media kibur ajangzüktsüsa ozüng yanglu aser iba melen pa aser par kibong jenjang ajungkettsüsa osang aben ta tai tonglokja lir. Ano pa jurila aser business nung yaritsü mechi sen dollar meyerijang aika jenjang billionaire Hollywood producer

Syria nung opposition-i sorkar kümettsü atema inyakteper

Damascus, Luchii/December 10 (Agencies): Syria yimtiba Damascus densema mapang tatsüka tsüngda linük nung tesem aika atsünga tir Bashar al-Assad atsüngtokba sülen Syria nung opposition-i sorkar kümettsü atema inyakteperdar.

Opposition lenir Ahmed al-Sharaa shiba dang Abu Mohammed al-Julani ta ajar, pai Ato Kilonser Mohammed al-Jalali den Hombarnü ajurutepa sorkar melentsü atema sensaksemogo.

Al-Jalali shiba al-Assad kübok inyaka liasü, pai Hayat Tahrir al-Sham indang (HTS) Syrian Salvation Government (SSG) nem tashi agütsütsü atema mulunga agizükogo.

"Sorkar takaratiba nung kecha tetsükdaksü makai anep anepa melenteptsü atema inyakteperdar," ta PM al-Jalali-i ashi.

Transitional sorkar ya Mohammed al-Bashir-i kümettsü, shiba HTS den sendaktepa lir aser Idlib nung amendaker aliba SSG tekolakba lir.

Syria dangi United Nations special envoy Geir Pedersen-i, Syria indang institution tem nung kecha tetsükdaksü madokdaksüi sorkar tashi melenteptsü ayongzükogo.

Sorkar kümetba sülen parnoki tawa atsüngba tesemtem tajungba azüoktsü merangba den sorkar institution tem yanglushitsü aser mintoker

aliba Syria nungertem aser rara ajanga jenshir alirtem meyipa anir arutsü atema inyaksü imlar, ta University of San Francisco nung politics professor Stephen Zunes-i Al Jazeera dang ashi.

HTS puri kanga kara jenjang agiba ajanga linük küm 13 tashi rara aruba nung temelenshi adokogo. Iba rara nung nisung meyrejang aika süogo aser refugee tebilemstsü tulu ka adokdakja liasü.

Al Assad tir asüba mapang nüburttem tashiyim agi azüokba, tepsetba, reshikangshiba aser pei ki toktsür tangaleni odaktsütsüsa akümba atema rights groups temi pa aija aruogo. Syria nunger dak chemical weapons amshiba atema-a pa aitsüogo.

Tzümentsüng aser anentsüh agi Java asetkong nung kongshi



Jakarta, Luchii/December 10 (Agencies): Indonesia nung asetkong tongtiba Java kübok tenem nung aliba yimtsüngtem tzüshi agi kongshiba sülen tekümkertemi tzüshi agi aponger aor tasümgang 10 ngutetogo, ya ketdangsurtemi

ashiba den ano nisung ana samara bushidar, ta metedaktsü.

Taoba hopta nung tzünglu kanga sashia aruba sülen ayongtem aika moshia ayim tenzük aser West Java province kübok Sukabumi district nung yimtsüng 170 tema dak kogshia liasü.

Tenemlen nungi lishi, long aser süngtongtem asepzüka alua liasü, ta Sukabumi nung rescue command post tekolakba Lieutenant Colonel Yudi Hariyanto-i Hobarnü metetdaksü.

Anentsüh, tzüshi aluba aser mopung kanga shia aonba ajanga yimtsüng 172 dak kongshi aser nisung 3,000 dak tema pei ki toktsür oa sorkrai amenokja aliba tejenokdak balala nung jenoka liasü, ta Hariyanto-i ashi. Ketdangsurtemi nisung 1000 shi dang pei ki toktsür aotsü asoshi tetuyuba agütsüogo, kechiyong tsüngsang kanga majungba ajanga ki 400 dak tema lendongbang nung liasü.

Iba lendong nung apu 31, lenmang 81 aser alu hectare 539 raksatsü aser ki 1,170 tashi kilem tonga tzü agi metsünga liasü.

Kasa mapang nung local disaster management agency-

i ashiba agi, tsüngsang majungba ajanga ki 3,300 dak tema raksatsüogo.

H o m b a r n ü tekümkertemi lendong agi tamajungtiba agi kongshir aliba Tegalbuleud, Simpenan aser Ciemas nungi tekümkertemi tasümgang 10 ngutetogo, kong tanur asem densema liasü. Maneni tekümkertemi yimdaklir ana samara aliba bushidar, ta Hariyanto-i ashi.

Social media nung lemsatepba video tem nung Sukabumi nung tzüshi agi gari, motorcycle, chang aser nashi aponger aoba nguogo.

West Java indang Search aser Rescue Agency-i lemsatepba video nung lenmangtem ayong kümer aliba aser yimtsüngtem lishi, long agi nembager aliba aser süngtongtem tera dena rakteter aliba sayuogo aser iba den tekümkertemi lishi nungi tasümgangtem agitetba nguogo.

Taoba ita-a North Sumatra province nung tzümentsüng aser anentsüh lendong nung nisung 29 süogo. Medan-a tzümentsüng agi kongshiba sülen tesem kar nung regional election atema vote agütsüba inyakyim nung kongshia liasü.

Sabalenka nem WTA Player of the Year naroküm agütsü



Luchii/December 10, 2024

(Agencies): Aryna Sabalenka-i tang mezüngbuba WTA Player of the Year naroküm agizükogo.

Belarus tsürla yagi taküm Grand Slam ana akokba den world number one jenjang nung küm tembangba sülen la nem iba naroküm agütsüogo, ta WTA-i sangdong ka ajanga metetdaksü.

January ita Australian Open küm anabuba atonga akokba sülen Sabalenka-i September ita U.S. Open akok, koba la atema Grand Slam title tasembuba liasü. Iba sülen ita ka lir lai Iga Swiatek ajateta tetsürtem rongnung No. 1 asayar aküm.

Laisa, Cincinnati aser Wuhan na nunga asayamung

akok aser 2024 küm asayamung pezü koker tembangogo.

International tennis media-isa, Paris Olympics gold medallists Sara Errani aser Jasmine Paolini na nem year's top doubles team naroküm agütsü aser America tsür Emma Navarro nem season's most improved player naroküm agüja liasü.

2023 küm world ranking nung jenjang 38buba nung tembangba sülen Navarro-i taküm Hobart nung asayamung ka akokba den asayamung trok tashi semifinal tonga asayaba sülen September ita la top 10-ai. Laisa Flushing Meadows nunga semifinal tonga asayaogo.

Kasa mapang nung Lulu Sun

nem Newcomer of the Year award agütsü. Lai qualifier ka ama Wimbledon nung quarter-finals tonga asayaba sülen iba naroküm nguogo. La January ita top 200 tema nung liasü saka Wimbledon nung quarter tonga asayaba sülen lai jenjang 40buba tongteta liasü.

Taoba mapang world number two asayar Paula Badosa, shiba teberem yiruba ajanga 2023 season tembanga masayateti liasü, la nem Comeback Player of the Year naroküm agütsüogo.

Taküm asaya tenzükba sülen Spain tsürla yagi Washington title aben aser iba sülen U.S. Open quarters nunga quarters tonga asayaba sülen la 12buba nung küm tembangogo.

West Indies nunger asayar Alzarri Joseph dang senchi achi



Luchii/December 10, 2024

(Agencies): Bangladesh den mezüngbuba ODI asayaba mapang yimya tamajung benshiba atema West Indies nunger cricketer Alzarri Joseph merenshiogo. Iba asaya ya St. Kitts and Nevis nung asaya liasü.

Pa dang pa indang match fee shilem 25 senchi chiogo.

ICC Code of Conduct kübok nung aibelenba atema pa anema iba jenjang agiogo.

Joseph-i Article 2.3 nung aibelen, koba o mashi jembiba dak sendaka lir.

Küm ana tsünga Joseph-i tang mezüngbuba aibelen menar aser pa indang record nung demerit point ka bendenloktsüogo.

Iba tatalokba ya asaya metenzük tsünga ataloka liasü. Joseph ya fourth umpire den asatop aser iba mapang pai o tamajung jembia liasü. Umpire-i Joseph dang spike

aketba tsüngsem semer field nung mejajatsü mepeshia liasü.

Joseph-i pai aibelenba nangzükogo aser pa nem temerenshi agütsüba agizükogo. Iba temerenshi ya Emirates ICC Elite Panel of Match Referees züngsem Jeff Crowe-i agüja liasü. Pai aibelen nangzük asünung ken o angadangtsü nüngdaka maka kümogo.

Iba tatalokba metetdaksüba ketdangsurtem rongnung on-field umpire Kumar Dharmasena aser Leslie Reifer na aser third umpire Asif Yaqoob aser fourth umpire Gregory Brathwaite nunger densema liasü.

ICC Code of Conduct, Level I nung aibelenba atema official warning ka agütsütsü akok mesüra asayar ka indang match fee tesadang senchi achitsü aser demerit points ka mesüra ana agütsütsü akok.

Alzarri Joseph ya West Indies cricket team nung bowler ka lir aser pa dang pa indang match fee quarter ka senchi chiogo.

Asian Cup qualifiers: India team Group C nung ata lir

Luchii/December 10, 2024

(Agencies): AFC Asian Cup Saudi Arabia 2027 Qualifiers Final Round atema India team Group C nung Hong Kong, Singapore aser Bangladesh den ata lir.

Hombarnü AFC House, Kuala Lumpur, Malaysia nung fixture draw asüba mapang team 24 telok trok küma lemsaogo aser telok shia team pezüzü alitsü.

Telok ajak nungi temaba jenjang nung takok angurtem dang AFC Asian Cup Saudi Arabia 2027 nung tanungba team 18 den adentsü shirnok tanabuba round sülen qualify süogo.

Qualifier tatembangbuba round ya March 25, 2025 aser March 31, 2026 na tsünga home-and-away format nung asayatsü.

AFC Asian Cup Saudi Arabia 2027 Qualifiers Final Round nung India team fixture:

March 25, 2025: India vs Bangladesh (home)

June 10, 2025: Hong Kong vs India (away)

October 9, 2025: India vs Singapore (home)

October 14, 2025: Singapore vs India (away)

November 18, 2025:

Bangladesh vs India (away)

March 31, 2026: India vs Hong Kong (home).

India team taoba mapang team asemprongla den ya asayaogo. Parnok tatema Bangladesh den 2021 SAFF Championship nung asaya aser Hong Kong den 2022 küm June ita Kolkata nung AFC Asian Cup Qualifiers nung asaya liasü. India team ano Singapore den 2022 küm September ita Hýng ThËnh Friendly Tournament nung asayaogo.

November ita sayaba FIFA Rankings nung India team jenjang 127, Hong Kong 156, Singapore 161 aser Bangladesh 185 nung lir.

AFC Asian Cup 2027 Qualifiers Final Round Full Draw Result:

Group A: Tajikistan, Philippines, Maldives, Timor-Leste

Group B: Lebanon, Yemen, Bhutan, Brunei Darussalam

Group C: India, Hong Kong, Singapore, Bangladesh

Group D: Thailand, Turkmenistan, Chinese Taipei, Sri Lanka

Group E: Syria, Afghanistan, Myanmar, Pakistan

Group F: Vietnam, Malaysia, Nepal, Laos.

WTC points table nung South Africa temaba jenjangi tuogo

Luchii/December 10, 2024

(Agencies): St. George's Park, Gqeberha nung Sri Lanka den tanabuba Test asaya run 109 agi akokba sülen South Africa team Hombarnü World Test Championship (WTC) points table nung temaba jenjangi tuogo.

Iba asaya akokba sülen parnoki iba asayamung 2-0 agi kokogo.

South Africa team-i tang percentage points 63.33 ngua lir aser parnoki Australia (60.71 percentage points) points 2.62 agi ajatetogo. Temetetsü kaji Australia-i Adelaide nung India wicket 10 agi akokba sülen parnok anogo ka atema temaba jenjang nung liasü.

Kasa mapang nung India team-i percentage points 57.29 ngua parnok tasembuba aser Sri Lanka-i percentage points 45.45 nguteta parnok pezübuba nung lir.

SA team temaba jenjangi

aruba sülen parnok taruba küm June ita Lord's nung WTC final asayatsü timla tulu nung lir. Ajisüaka final nung asayatetsü atema parnoki Pakistan den Test ana asayatsü aliba ya akoktsü nüngdaker.

Tanabuba Test asaya nung spinner Keshav Maharaj-i kanga tongtiba shilem agia South Africa team takok dangi ani. Pai tatembangbuba anogo wicket pongu agia liasü.

Maharaj-i run 76 agütsür wicket 5 agiba sülen Sri Lanka team nem run 238 dang yangludaksü aser South Africa team-i minute 70 nung dang wicket pongu agi asaya koka liasü.

WTC final nung asayatsü atema timla mesamatsü asoshi team anaprongla iba asaya akoktsü nüngdaka liasü. Ajisüaka team anarongnung South Africa-i tajungba asayateta parnok Lord's nung asayatsü timla mesamai lir.

BILEMDANGANG

"Tamakok ajang dang takokji shisanger."